


EDITORIAL

Ilantad at labanan ang MLSA! Ibagsak ang taksil na rehimeng Macapagal-Arroyo!




Galit ang inani ng rehimeng Macapagal-Arroyo nang pirmahan nito ang Mutual Logistics Support Agreement (MLSA) noong Nobyembre 21 sa kabila ng mariin at matagal nang pagtutol dito ng malawak na hanay ng lipunan. Agad itong sinalubong ng matitinding kilos protesta at pagbatikos mula sa iba't ibang sektor.

Di lamang ang rebolusyonaryong kilusan at mga militante at progresibong organisasyon ang nagalit sa gayong pagpapakatuta at pagtatraydor.

Mahigpit din ang pagbatikos ng maraming katunggali sa reaksyunaryong pulitika. Maging mga alyado ni Macapagal-Arroyo sa naghaharing koalisyon ay nabastos sa di man lamang pagkonsulta at pagpapaalam sa kanila tungkol sa pag-apruba sa MLSA. Tampok ang magiit at tuluy-tuloy na pagtuligsa rito ni Vice President Guingona at paglakas ng pagkakaisa sa hanay ng mga pwersang kontra sa panghihimasok ng US.

Sadyang hindi isinalang sa debate at pag-susuri ng mamamayan ang MLSA dahil batid ng Malakanyang ang matinding mga pagtutol dito. Nagsabwatan ang US at ang rehimeng Macapagal-Arroyo upang bago ang pirmahan ay maipagkait sa mamamayan ang mga kaalaman tungkol sa tunay na layunin at nilalaman ng kasunduan at implikasyon nito sa kagalingan at kaligtasan ng Pilipinas.

Minadali ang pag-apruba sa MLSA upang lubusan nang magamit ang bansa bilang lunsaran, pahingahan at *transit point* ng mga tropa ng US sa napipintong gerang agresyon nito laban sa Iraq. Balak ding ihanda ang pagbabase sa Pilipinas bilang lunsaran ng agresyon at mas matinding panghihimasok sa North Korea, Indonesia, Malaysia at iba pang bansa sa Asia, kailanman kakailanganin. Sa gayon ay masasangkot ang Pilipinas sa mga gera ng US at maisasapanganib ang buhay at seguridad ng mga mamamayan nito.




Ang patraydor na pag-apruba sa MLSA ay tanda di lamang ng walang pakundangang pagpapakatuta ng rehimeng Macapagal-Arroyo sa amo nitong imperyalismong US. Ito ay pagtraydor din sa mamamayang Pilipino, tahasang pagwawalang-bahala sa kanilang kapakanan at todo-todong pagkontra sa kilusang mapagpalaya.

Sa harap ng lahat ng ito, kailangang ibayong imulat ang mamamayan, palakasin at palawakin pa ang pag-oorganisa sa kanila, palaparin ang pambansang patriyotikong prente at maglunsad ng mga koordinado at malawakang pagkilos upang depensahan ang soberanya at pambansang integridad ng Pilipinas at mariing tutulan ang nakaambang agresyong militar ng US. Ang matitinding protestang bumulwak sa pagkapirma ng MLSA ay nagbabadya ng mas malalaki pang pagkilos sa hinaharap.

Gamitin ang lahat ng paraan at anyo ng pagkilos at maging mapanlikha sa pagpopropaganda upang maipabatid sa mamamayan ang katotohanan sa likod ng MLSA, VFA at iba pang katulad na kasunduan. Dapat iugnay ang kilusang anti-VFA at anti-MLSA sa mas malawak na kilusang anti-imperyalista, kabilang ang kilusan laban sa imperyalistang “globalisasyon” at iba pang anyo ng pagsasamantalang pang-ekonomya ng imperyalismong US sa Pilipinas. Dapat paigtingin pang lalo ang kilusan para mapatalsik na ang ubodnang-tuta, mapaniil, bulok at kasuklam-suklam na rehimeng Macapagal-Arroyo. **AB**

- 1 **Editorial: Ilantad at labanan ang MLSA!**
- 3 **Walang *ceasefire* sa Kapaskuhan**
- 4 **Matatagumpay na TO ng BHB**
Dadami, dadalas at lalaki ang mga TO—Ka Roger
- 6 **Korapsyon ng rehimeng Macapagal-Arroyo**
- 8 **Nagkukumahog si Macapagal-Arroyo**
- 10 **Pang-aakit ng higit na suporta ng US sa 2004**
- 11 **Pananalanta ng pasistang estado**
- 13 **Krisis pampulitika sa Venezuela**
- 14 **Si Hugo Chavez**
- 15 **Afghanistan: Isang taon ng pananakop**
Ang bangis ng mga tropang US sa Afghanistan
- 16 **Kapitalistang panunumbalik sa China**
- 17 **Balita**



Walang *ceasefire* sa harap ng walang tigil na pang-aatake ng rehimeng Macapagal-Arroyo

*Pahayag ni Gregorio "Ka Roger" Rosal
Tagapagsalita, Partido Komunista ng Pilipinas
6 Disyembre 2002*

Bagamat kagawian at pagnanais ng PKP/BHB na magdeklara ng tigil-putukan tuwing Pasko upang bigyang-daan ang pagdiriwang ng mamamayan at bigyang-tulak ang mga usapang pangkapayapaan, ang rehimeng US-Macapagal-Arroyo na mismo ang nag-alis ng puwang upang magkaroon ng anumang saysay ang pagdedeklara ng *ceasefire* ngayong Kapaskuhan.

Pinagpasyahan ng Komite Sentral ng Partido Komunista ng Pilipinas na hindi ito maaaring magdeklara ng *ceasefire* ngayong Kapaskuhan. Ito'y dahil sa sobrang pagkapapet, anti-mamamayan at pasistang galaw ng rehimeng Macapagal-Arroyo, laluna nitong nagdaang taon.

Nitong Nobyembre 21, patraydor na inaprubahan ng rehimen ang Mutual Logistics Support Agreement na lubusang lumalapastangan sa soberanya at teritoryal na integridad ng bansa. Sa pamamagitan nito at ng Visiting Forces Agreement, ginawa na ng rehimen na baseng militar ng US ang buong Pilipinas para ibayong mapanghimasukan ang paglaban sa rebolusyonaryong kilusan sa Pilipinas at magawang lunsaran ang bansa sa mga gerang agresyon at panghihimasok ng US sa ibang bansa.

Alinsunod rin sa utos ng US, pinaigting ng rehimen ang pasismo, sinasagasaan ang prosesong pangkapayapaan at walang-awat na tinotodo ang kontra-rebolusyonaryong gera. Pinatitindi nito ang paglapastangan sa kapakanan ng mamamayan, pandarambong at pagpapahirap sa bayan.

Pasko man o hindi, walang lubay ang rehimen sa paninibasib nito sa mamamayan at ang pagpapatindi ng *all-out war* nito laban sa rebolusyonaryong kilusan. Bago nito'y matagal na nitong isinaisantabi ang usapang pangkapayapaan. Parang sirang-plaka nitong binabansagang "terorista" ang rebolusyonaryong kilusan at lumilikha ng isterya ng "terorismo" upang linlangin ang malawak na masa at bigyang-matwid ang pagpapatindi ng pasistang paninikil sa mga karapatang demokratiko at sibil.

Mas malala pa, balak ng rehimen na gamitin ang darating na Kapaskuhan upang lalong pagibayuhin ang paninira, intriga at armadong atake laban sa rebolusyonaryong kilusan. Ang walang tigil na pang-aatake ng rehimen ay epektibong pumatay sa usapin ng *ceasefire*.

Walang pasko-pasko kay Macapagal-Arroyo. Siya na mismo ang nagsabing wala itong kainte-interes na magkaroon ng seryosong *ceasefire* ngayong Kapaskuhan katulad ng nauna nang sinabi ng kanyang mga heneral sa AFP at PNP.

Kaakibat nito, inaabisuhan ang lahat ng mga yunit ng BHB at ang mamamayan, laluna sa mga sona at larangang geriyla, na pagibayuhin ang pagmamatyag at kahandaan. Kailangang aktibong magtanggol sa sarili at puspusang labanan ang anumang pananalakay at panunupil ng reaksiyunaryong rehimen, magdeklara man o hindi ang AFP at PNP ng kanilang huwad na *suspension of offensive military operations* (SOMO). **AB**



PUSAKAL NA KORONEL SUGATAN SA AMBUS SA ORIENTAL MINDORO

NASUGATAN sa magkabilang hita si Col. Jovito Palparan, kumander ng 204th IBde, sa pananambang ng BHB sa Barangay Villaflores, Puerto Galera, Oriental Mindoro noong Nobyembre 24. Naganap ang ambus matapos ipangalandakan ni Palparan na nalipol na ang BHB sa 90% ng Mindoro.

Hindi bababa sa apat na sundalo ang napatay nang pasabugan ng *landmine* ang kanilang trak. Paatras na ang mga gerilya nang masugagaan nila ang pansibilyang sasakyan ni Palparan na umiiwas sana sa labanan.

Si Palparan ay pusakal na berdugo sa Mindoro. Responsable siya sa maraming kaso ng pagdukot at pagsalbeyds sa isla.

"DADAMI, DADALAS AT LALAKI ANG MGA TAKTIKAL NA OPENSIBA SA 2003"—KA ROGER

Nagtipon-tipon ang ilang piling myembro ng midya noong Disyembre 7 sa isang sonang gerilya sa Kabikulan upang kapanayamin si Gregorio "Ka Roger" Rosal, tagapagsalita ng Partido Komunista ng Pilipinas. Naging masaya ang pagtitipon na kinatampukan ng pagtatalumpati ni Ka Roger, pagpaparada ng mga mandirigma ng Bagong Hukbong Bayan at pagsasalusalo ng mga kalahok sa isang gabi ng mga pangkulturang pagtatanghal.

Sa kanyang talumpati, mariing binatikos ni Ka Roger ang paggamit ng rehimeng US-Macapagal-Arroyo ng maruruming taktika laban sa rebolusyonaryong kilusan. Kabilang dito ang ikinakalat nitong samu't saring maruruming propaganda at ang pagkukumahog nitong maipinta bilang mga "terorista" at "kriminal" ang mga rebolusyonaryo. Ani Ka Roger, "ito ang pinakamababang klase ng propaganda: pambabaluktot sa katotohanan at pag-iimbento ng kwento".

Binatikos din niya ang todo-todong digma ng rehimen na walang ibang binibiktima kundi ang mga di armadong sibilyan sa kanayunan. Aniya, hindi iilan ang nasuka nang sinabitan ni Macapagal-Arroyo ng medalya si Col. Jovito Palparan, pusakal na tagalabag ng karapatang-tao matapos ito tambangan ng mga Pulang mandirigma noong Nobyembre 24 sa isla ng Mindoro. Habang tumatagal, "nagiging kamukha na ni GMA si

Marcos, laluna sa usapin ng paglabag sa karapatang-tao".

Kung tutuusin, ang rehimeng Macapagal-Arroyo ang terorista sa Pilipinas dahil wala itong pakundangang pumapatay at nambibiktima ng mga sibilyan. Bunga ito ng kanyang desperasyong manatili sa poder, sa harap ng pabulusok na popularidad dala ng naglalabasang baho ng mga kaso ng korapsyon at anomalya, sobra-sobrang pagpapakata at papalubhang krisis sa ekonomya.

Tinagurian ni Ka Roger ang imperyalismong US bilang "super-terorista" at "si Gloria Macapagal bilang "numero unong terrorist lover".

Ayon kay Ka Roger, hindi maaaring magsagawa ng mga teroristang aksyon ang rebolusyonaryong kilusan. "Ang pagrerebolusyon ay hindi terorismo. Ang terorismo ay taliwas sa pagrerebolusyon", dagdag niya.

Kabaligtaran ng ipinakitang desperasyon ng rehimeng Macapagal-Arroyo, mabilis na sumusulong ang rebolusyonaryong kilusan sa kanayunan. Ani Ka Roger, "lalong dadami, dadalas at lalaki ang mga taktikal na opensiba sa taong 2003".

"Lahatang-panig na mas malakas ang Partido Komunista ngayon kumpara sa pagsisimula ng kilusang pagwawasto noong 1992. Parami nang parami ang tumatalikod sa naghaharing sistema at yumayakap sa rebolusyonaryong programa ng PKP," dagdag pa niya. **AB**



KUMpanya sa LOGGING PINARUSAHAN SA ISABELA

SINUNOG ng Bagong Hukbong Bayan (BHB) ang di bababa sa 20 trak, isang bulldoser, isang *forklift* at isang *pickup truck* sa *sawmill* ng Philippine Aggregates Timber Export Company (Pateco) nitong Disyembre 7 sa Sityo Diden, Barangay Dibulo, Dinapigue, Isabela. Tinatayang aabot sa P60 milyon ang halaga ng pinsala.

Bago sinunog ang kagamitan, inilayo muna ng mga gerilya ang mga drayber at *heavy equipment operator*.

Pinarusahan ang Pateco dahil sa pagwasak nito sa kapaligiran at hindi pagtalima sa mga patakaran ng rebolusyonaryong gubyernong bayan sa pagbubuwis.

KUMpanya NG SEMENTO, PAGMIMINA, PINARUSAHAN NG BHB

SINUNOG ng mga Pulang mandirigma ang *control room* ng planta ng Goodfound Cement Corporation, isang kumpanyang Taiwanese, sa Barangay Palanog, Camalig, Albay noong Nobyembre 29. Ayon sa Santos Binamera Command, prubinsyal na kumand ng BHB, parusa ito sa pamiminsala ng kumpanya sa kalikasan at sa kalusugan ng mamamayan sa lugar.

Ang Goodfound ay isang mayor na prodyuser ng semento sa silangang bahagi ng Pilipinas. Bago pa man maitayo ang pabrika noong 1997, mariin nang tinututulan ng mga Albayano ang operasyon nito.

Bandang alas-10 ng gabi nang pasukin ng mga gerilyang nagpanggap na mga sundalo ng AFP ang pabrika. Sinamsam nila ang pitong *shotgun* at pitong .38 rebolber ng mga gwardya. Bago isagawa ang pagsunog, pinalikas muna ng mga gerilya ang mga empleyado ng pabrika tungo sa isang kalapit na paaralan.

Samantala, matagumpay ding nadisarmahan ng isang yunit ng BHB ang mga gwardya ng isang kumpanya ng pagmimina sa Agusan del Sur noong Nobyembre 24. Labindalawang malalakas na armas ang nasamsam ng mga Pulang mandirigma.

MATATAGUMPAY NA OPERASYON, INILUNSAD SA SARANGANI AT NEGROS

ISANG sundalo ang napatay at isa pa ang nasugatan nang ambusin ng BHB ang mga tropa ng 11th at 61st IB na nagpapatrulya sa Sityo Bangko-Bangko, Barangay Manlocahoc, Sipalay City sa Negros Occidental noong Nobyembre 10.

Anim na ripleng Garand na man ang nakumpiska ng mga gerilya mula sa mga kasapi ng Civilian Volunteer Organization (CVO) sa Barangay Congan, Glan, Sarangani noong Nobyembre 8. Hindi nakapagpaputok ang mga kampanateng elemento ng CVO.

RHB TINAMBANGAN SA PAMPANGA

APAT na elemento ng bandidong Rebolusyonaryong Hukbong Bayan (RHB) ang napatay nang tambangan sila ng mga Pulang mandirigma sa Sta. Ana, Pampanga noong Nobyembre 9. Tatlong malalakas na armas ang nasamsam sa mga bandido.

Ayon kay Armando Ortillano, tagapagsalita ng Palermo Ortáñez Command ng BHB-Pampanga, nagtangkang sumaklolo sa RHB ang mga tropa ng 69th IB at 46th Military Intelligence Group (MIG) subalit maagap na nakaatras ang mga Pulang mandirigma. Upang pagtakpan ang matagumpay na taktikal na opensiba ng BHB, pinalabas ng 7th ID sa midya na sila ang nagsagawa ng ambus.

Ang naturang ambus ay tugon sa panawagan ng masa na parusahan ang RHB dahil sa kanilang mga krimen laban sa mamamayan sa Gitnang Luzon. Kabilang dito ang pamamaslang at *harassment* sa mga inosenteng sibilyan; pangungulimbat at pangingikil; at pagsira at sapilitang pagpasok sa mga bahay ng sibilyan.

Lumalalang korapsyon ng rehimeng Macapagal-Arroyo

Kaliwa't kanan at halos araw-araw ang pagsingaw ng mga kaso ng korapsyon at anomalyang kinasasangkutan ni Macapagal-Arroyo, ng kanyang asawa at ng matataas na upisyal ng kanyang rehimen. Dahil sa saklaw at laki ng mga kaso, hindi na masikmura kahit ng mga kaalyado ni Macapagal-Arroyo ang kanyang garapal at lantarang oportunismo at kasibaan.

Dahil dito, nagpahayag ng matinding pagkadismaya sa rehimen kahit ang Makati Business Club at ang World Economic Forum. Maaalalang ang Makati Business Club ang isa sa mga organisasyon ng mga negosyanteng pangunahing sumuporta sa pagkakaluklok ni Macapagal-Arroyo sa kapangyarihan. Bago ito, tinukoy ng Transparency International ang Pilipinas bilang ika-11 sa pinakatiwaling bansa sa buong mundo.

Tinatayang umabot sa P190 bilyon ang kinurakot ng kasalukuyang rehimen noong 2001. Ibinulsa ng mga sindikato ng korapsyon na nakabase ngayon sa Malakanyang ang mahigit P95 bilyong buwis na naiwasang bayaran ng malalaking kumpanya sa pamamagitan ng mga "tax scam". Tinataya namang P21 bilyon ang nakuhang kikbak mula sa pagbili ng guberno ng mga materyales, serbisyo at imprastruktura. Umabot naman sa P74 bilyon ang nahuthot (pangunahin ng mag-asawang Arroyo) sa mga transaksyon ng guberno sa mga pribadong korporasyon kaugnay ng malalaking kontrata para sa mga "proyekto pangkaunlaran".

Nitong huli lamang, habang mainit pa ang isyu ng pagkakalanat sa malakihang katiwalian ng Malakanyang sa PIATCO at President Diosdado Macapagal Boulevard, nalantad na naman ang mas malalaki pang katiwalian ng Malakanyang kaugnay ng pagbibigay sa IMPSA ng Caliraya-Botocan-Kalayaan Project at pagtatangka ng Malakanyang na agawin ang Meralco mula sa pamilyang Lopez.

IMPSA

Nitong Nobyembre, lubusan nang nalantad ang kaso ng panghuhuthot ni Justice Sec. Hernando Perez at ng Malakanyang sa kontratang pang-enerhiya ng Industrias Metalurgicas Pescarmona Sociedad A n o n i m a (IMPSA), isang korporasyong Argentino. Ibinunyang ito mismo ni Kongresman Mark Jimenez, dating alipures ni Estrada, na umaklong susing tagapamagitan ng

IMPSA at ng bagong luklok na rehimeng Macapagal-Arroyo noong Enero 2001. Limang araw pa lamang pagkaupo ni Macapagal-Arroyo sa poder, paspasang inaprubahan ng rehimen ang maanomalyang kontrata sa pagpapagana sa planta ng kuryente sa Caliraya-Botocan-Kalayaan, kapalit ng \$14 milyong suhol (P700 milyon) na pinaghati-hatian nina Perez, Finance Sec. Jose Camacho at Macapagal-Arroyo.

Bagamat nakasentro kay Perez ang "exposé" ni Jimenez, hindi maiwasang "madawit" si Macapagal-Arroyo lalupa't nalantad ang pagkakasangkot ng kanyang malapit na kaibigan at lihim na opereytor na si Ernest Escaler. Isa si Escaler sa mga pangunahing tagalikom ng pondong pang-eleksyon ni Macapagal-Arroyo. Noong 1999, itinayo niya ang For the Glory of Children's Foundation Inc., isang prenteng organisasyon para sa noo'y bise-presidenteng Macapagal-Arroyo. Ipinangangalandakan ni Escaler na siya ay simpleng "pribadong bangkero". Ngunit katulad ni Jimenez, kilala si Escaler bilang eksperto sa *money laundering* o pagbabangko ng nakaw na yaman upang itago ang mga tunay na katangian at nagmamay-ari nito. Matapos magtangkang isalba ang sarili, kumaripas papuntang US si Escaler.

Si Escaler ay tumayong kinatawan ni Maca-



pagal-Arroyo sa mga lihim na negosasyon ng rehimen sa IMPSA. Sa kanya rin dumaloy ang suhol na nakalagak ngayon sa mga lihim na *bank account* sa labas ng bansa. Kung tutuusin, maliit lamang ang \$2 milyong tinanggap ni Perez kumpara sa ibinulsa ni Macapagal-Arroyo. Kung kaya gayon na lamang ang pagkakandarapa ni Macapagal-Arroyo na atakehin si Jimenez at labanan ang anumang klaseng imbestigasyon sa kaso. Upang ilayo ang sarili sa kontrobersya, kaagad niyang iniutos kay Perez na magbakasyon bilang kalihim ng Department of Justice. Pansamantalang humalili bilang kalihim si Merceditas Gutierrez, matalik na kaibigan ng pamilyang Arroyo.

Meralco

Nitong Nobyembre rin nabunyag ang panghuhuthot ng rehimen sa pamilyang Lopez. Ayon mismo kay Camacho, nagsimula ang negosasyon sa pagitan ng rehimen at ng pamilyang Lopez noon pang Oktubre nang matantya ng huli ang di paborableng resolusyon sa ligal na mga kaso ng Meralco. Naging puspusan ang mga lihim na negosasyon ilang araw bago tuluyang iutos ng Korte Suprema sa Meralco na ibalik sa mga konsyumer nito ang P28 bilyong ilegal nitong siningil sa nakaraang walong taon. Ang halagang ito ay halos 40% ng tinatayang P71 bilyong kapital ng kumpanya. Kung agad na ipatutopad, buburahin nito ang anumang kita ng kumpanya ngayong taon at sa susunod pang mga taon.

Hawak ngayon ni Macapagal-Arroyo sa leeg ang pamilyang Lopez dahil nasa kamay ng Energy

Regulatory Commission ang pagtakda kung paano at gaano katagal ang pagsasauli ng sobrang singil. Upang lalong paluhurin ang pamilyang Lopez, nagbanta ang rehimen na aagawin nito ang kontrol sa Meralco.

Ayon pa kay Sen. John Osmeña, hindi lamang ang Meralco ang target ng rehimen. Malaki rin ang interes nitong makakuha ng kunsensyon, kundiman kontrol, sa dambuhalang korporasyong midya ng pamilyang Lopez, ang ABS-CBN. Upang pwersahin ang mga Lopez, hindi na naglalabas ng mga pampubliko at pampulitikang patalastas sa ABS-CBN ang gobyerno mula pa

noong nakaraang taon. Dulot nito, bumagsak nang 12% ang kabuuang kita ng istasyon mula sa mga patalastas. Interesado si Macapagal-Arroyo na makuha ang ABS-CBN, kabilang na ang The Filipino Channel, para sa kanyang kandidatura sa 2004. Sa harap ng pagkakapasa ng Overseas Absentee Voting na magpapahintulot sa mga Pilipino sa labas ng bansa na bumoto sa eleksyon, malaki ang maitutulong ng The Filipino Channel, ang tanging *cable channel* sa Pilipinas na may brodka sa iba't ibang bansa.

Sa desperasyon ni Macapagal-Arroyo at ng kanyang mga alipures na magkamal ng yaman at mag-ipon ng pondo para sa eleksyong 2004, lalo lamang nilang inilalantad ang kanilang mga sarili

bilang mga tiwaling burukratang walang pinagkaiba sa kinamuhang rehimen Estrada.

Hindi malulunod kahit ng pinakabagong pakulong kontra-korapsyon ng kanyang mga propagandista ang mga iskandalong dala ng mga ito.

Nitong Nobyembre 30, ini-annunsiyo ni Macapagal-Arroyo ang paglusaw sa Philippine Estate Authority (PEA) at pagpapawalambisa sa mga kontrata ng gobyerno sa Philippine International Air Terminal Co. (PIATCO). Walang niresolba ang mga desisyong ito. Kung tutuusin, magsisilbi pa ito para matabunan ang pagkaka-sangkot ng kanyang pangalan sa mga kontrobersyang bumaba-

Hindi malulunod
kahit ng
pinakabagong
pakulong kontra-
korapsyon ng
kanyang mga
propagandista ang
mga iskandalong
dala ng mga ito.

yo sa dalawang organisasyon. Matatandaang nabulatlat ang pagkaka-sangkot ng mag-asawang Arroyo sa sobrang pagpepresyo ng kanilang mga alipures sa PEA sa President Diosdado Macapagal Boulevard noong Oktubre.

Kasabay noon ang pagkabunyag ng pambabraso ng rehimen, sa pamamagitan ni Presidential Adviser on Strategic Projects Gloria Tan-Climaco, sa mga korporasyon ng PIATCO na sangkot sa pagtatayo ng Ninoy Aquino International Airport (NAIA) Terminal 3. Dahil hindi na hawak ng PIATCO ang mga kontrata, malaya na si Macapagal-Arroyo na ipagkaloob ang mga ito sa mas pinapaborang kroni o di kaya'y muling makipag-negosasyon dito para sa panibagong suhol. **AB**

Nagkukumahog si Macapagal-Arroyo para sa 2004

Habang umiinit at dumarami ang mga kontrobersya sa mga kaso ng korapsyon at anomalya ng matataas na upisyal ng rehimen, lumiliit nang lumiliit ang nalalabing posibilidad na makatatagal pa sa pwesto si Macapagal-Arroyo lampas ng 2004. Nagkukumahog siya ngayon para habulin ang duma-dausdos na pag-asa niyang manalo sa eleksyon.

Sa pinakahuling mga sarbey, palagiang nalalaman ng dalawa o tatlo pang mga potensyal na kandidato si Macapagal-Arroyo. Dahil dito'y maging ang kampo ng napatalsik na presidenteng si Estrada ay nagmamalaking dadaigin si Macapagal-Arroyo ng kahit sinuman sa kanilang hanay. Kahit sa loob ng naghaharing paksyon, hindi buo ang suporta para sa kanya. Bukod sa malawak ang pagiging matabang sa kanyang pagtakbo, marami rin sa kanyang mga kapartido ang interesadong kumandidato sa pagkapresidente.

Walang lumilitaw na masasandigang malakas na sariling makinaryang pang-eleksyon si Macapagal-Arroyo. Ang mga reaksyunaryong partidong sumuporta sa kanyang pagkakaluklok sa Malakanyang ay may sari-sariling interes at direksyon at walang anumang katapatan sa kanya. Ang pangunahin dito, ang LAKAS-NUCD ay kontrolado ni dating President Fidel Ramos na lihim na tutol sa kanyang kandidatura. Ang tanging maaasahan niya ay ang pipitsuging partidong KAMPI na itinayo ni Jose "Peping" Cojuangco—na mas kiling sa Council for Philippine Affairs—at pilit na lamang na binubuhay para kay Macapagal-Arroyo ng kanyang propagandistang si Dante Ang.

Upang punan ang kakulangang ito, isinasakay ni Macapagal-Arroyo ang pagpapatuloy ng kanyang pampulitikang ambisyon sa pagmamaniobra sa istrukturang bukratikong-militar sa buong bansa. Ipinwesto niya sa mga estratehikong pusisyon sa bukrasyang sibil ang mga retiradong

upisyal ng pulisya at militar na napatunayan nang tapat sa kanya. Sa tulong ng militar at pulisya, itinayo ng kanyang personal na mga propagandista noong Nobyembre ang mga Gabay sa Mamamayan Aksyon Center (GMA Center). Sa pamamagitan nito, napapakinabangan niya ang latag ng lambat-paniktik ng AFP at PNP sa mga baryo sa kanayunan laban sa rebolusyonaryong kilusan bilang lambat ng suporta at makinaryang pangampanya. Kinokoordina mismo ng Malakanyang ang paglalata at aktibidad ng mga GMA Center at ng mga sibilyang ahensya ng gubyrerno upang magamit ang mga rekursong at bukratikong organisasyon sa pagtatayo ng pangmasang makinarya ni Macapagal-Arroyo.

Sinisikap palawakin din ni Macapagal-Arroyo ang kanyang base sa loob mismo ng istrukturang militar. Pinatataba niya ang matataas na upisyal nito sa pamamagitan ng panunuhol. Ipinatupad niya ang "revolving door policy" o walang katapusang pagriri-



godon sa pamunuan ng AFP upang mapagbigyan at sa gayon makabig ang mas maraming upisyal na gustong maging hepe nito kahit sa maiksing panahon lamang.

Sa kabilang banda, patuloy siyang nagbabantay sa loob ng sari-ling kampo para mapigilan ang sinumang may malakas na potensyal, nagpapakita na rin ng interes na tumakbo sa pagkapangulo at may panganib (para kay Macapagal-Arroyo) na maaaring suportahan ng US. Ginamit ni Macapagal-Arroyo ang mga kaso at hinang ng mga empleyado ng Department of Education laban sa noo'y kalihim nitong si Raul Roco upang siran at sipain ito sa

kanyang gabinete noong Setyembre. Tuluy-tuloy na nangunguna si Roco sa mga sarbey sa pagkapangulo ng iba't ibang institusyon. Nang mapansin niyang nagpapahiwatig at naghahanda si Defense Sec. Angelo Reyes para sa sariling pampulitikang ambisyon, kaagad ring nagmaniobra si Macapagal-Arroyo na sagkaan ito. Si Macapagal-Arroyo mismo ang nagbunyag sa P500 milyong anomalyang kinasangkutan ni Reyes sa Department of National Defense. Ginagamit ni Reyes ang pondo upang magtayo ng mga *non-government organization* (NGO) at institusyong hindi nalalayo sa mga prenteng *charity foundation* ni Macapagal-Arroyo.

Samantalang wala pang katiyakang itutuloy ni Reyes ang pagtakbo sa pagkapangulo sa 2004, nagkakatu- lungan pa sila ni Macapagal-Arroyo sa gubyrno. Maaari pang makuha ni Reyes ang basbas ng US bunga ng ibayong panghihina sa pulitika ni Macapagal-Arroyo.

Milyon-milyong dolyar at ilang bilyong piso ang inihahabol ng

mag-asawang Mike at Gloria Macapagal-Arroyo para sa pagtakbo sa 2004. Kalakhan nito ay kinukuha mula sa mga may konse- syon at kontrata sa lahat ng malala- king proyekto ng gubyrno—ilan lamang sa pinaka- malalaki at kon- trobersyal ang NAIA 3, ang Pre- sident Diosdado Macapagal Bou-

levard at ang Caliraya-Botocan- Kalayaan Project—at mga pondo ng PAGCOR, Philippine Charity Sweepstakes Office at iba pang upisinang tuwirang nasa ilalim ng Presidente at hindi na inaawdit ng Commission on Audit.

Dahil napipinto na ang pagsa- sabatas ng *absentee voting* (pagbo- to ng mga Pilipino na nagtatrabaho at naninirahan sa labas ng bansa), walang kadeli-delikadesang itinala- ga ni Macapagal-Arroyo ang asawa niya bilang “espesyal na embaha- dor” para sa mga Overseas Filipino Workers (OFW). Walang ibang la- yunin ito kundi ang maluwag na paggamit ni Mike Arroyo ng pondo at iba pang rekurso ng gubyrno

para akitin ang boto ng pitong milyong OFW para sa kanyang asawa ngayon pa lamang. Kunwa’y hindi siya maniningil ng sweldo at pamasahero pero sasagutin ng gub- yerno ang gastos ng maraming kasabay niya at gagamitin niya para sa pangangampanya ang mga tauhan, rekurso at pondo ng mga embahada at iba’t ibang ahensya ng gubyrno na may kinalaman sa mga OFW.

Pinaghahandaan na rin ng Malakanyang ang pagkuha ng ma- laking suportang pampinansya mula sa malalaking negosyo. Ang panibagong bugso ng pagbibigay ni Macapagal-Arroyo ng mga pang- ekonomyang kunsesyon sa malala- king negosyo ay sadyang may ga- nitong layunin (*Tingnan ang arti- kulong “Pang-aakit ng higit na suporta ng US at mga kumprador sa 2004”*).

Sa lahat, ang pangunahing ina- asahan ni Macapagal-Arroyo at siyang pinakamapagpasya sa kala- labasan ng mga reaksyunaryong eleksyong presidensyal sa bansa ay ang basbas at suporta ng US. Para tiyakin ito, asal-tutang sunud- sunuran siya sa bawat dikta ng im- peryalismong US, pangunahin na sa pagtataguyod ng pandaigdigang “gerang kontra-terorismo” ng US at pagpapatupad nito sa Pilipinas at sa pagtataguyod ng imperyalistang “globalisasyon”. Para lalo pang lumaki ang papel niya sa mata ng US, ipinipresenta niya ang kanyang sarili bilang “kampyon ng kontra- terorismo” sa Southeast Asia at pa- traydor niyang inaprubahan ang MLSA sa kabila ng malawak na pagtutol ng mamamayan, ng reak- syunaryong oposisyon at maging ng kanyang mga kapartido. **AB**

Pang-aakit ng higit na suporta ng US at mga kumprador sa 2004

Nitong huling mga araw ng Nobyembre at unang mga araw ng Disyembre, gumawa ng ilang pagpapalit sa kanyang gabinete si Macapagal-Arroyo. Hindi totooang pagpipino o pagpapahusay lamang ang layunin ng mga ito, tulad ng sinasabi niya.

Mahigpit na naninindigan si Macapagal-Arroyo para kay Justice Sec. Hernando Perez. Gayunman, napilitan ang presidente na pagbakasyunin si Perez nitong Nobyembre 27 dulot ng matinding akusasyon ni Rep. Mark Jimenez na tumanggap si Perez ng \$2 milyong (katumbas ng mahigit P100 milyon) suhol.

Noong Nobyembre 30, isinunod ni Macapagal-Arroyo ang pagpapalit ng ilan pang myembro ng kanyang gabinete dulot ng mabigat na presyur sa rehimen na pagibayuhin pa ang pagpapatupad ng imperyalistang “globalisasyon” at ang pagbibigay ng higit na mga kunsesyon sa malalaking dayuhan at kumprador na interes.

Ang pagtanggap kay Heherson Alvarez sa Department of Environment and Natural Resources (DENR) ay pabor na ibinigay ni Macapagal-Arroyo sa malalaking negosyong karibal ni Alvarez. Kabilang sa mga ito ang Paper Industries Corporation of the Philippines (PICOP), ang pinakamalaking kumpanyang nagtotroso sa Pilipinas, at ang pamilyang Pichay na kapwa inaasahan ni Macapagal-Arroyo na magbigay ng suporta sa kanyang kandidatura sa 2004. Ginagamit ng natu-

rang mga kaaway ni Alvarez ang mga kinasangkutan kaso ng korapsyon at mga maanomalyang kontratang pinasok niya bilang kalihim ng DENR.

Hindi sinang-ayunan ni Alvarez ang kagustuhan ng PICOP na makakuha ng “presidential warranty” para tuluy-tuloy na mawakan ang mga lipas na nitong kunsesyon sa Mindanao. Iginiit din niyang dapat bayaran ng kumpanya ang P38 milyong utang na buwis sa guberno. Hindi rin nagustuhan ng PICOP ang panukalang binuo ni Alvarez para resolbahin ang gulo sa Mt. Diwalwal.

Kinalaban din ni Alvarez si Cavite Rep. Plaridel Abaya dahil sa pagkikipagkutsabahan nito sa maraming patakbuhing kumpanya sa pagpapasok nila ng mga kemikal na sumisira sa *ozone layer*.

Ipinalit kay Alvarez si Elisea Gozun, isang *assistant secretary* ng DENR at kilalang konsultant ng World Bank at Asian Development Bank sa mga usapang pangkapaligiran.

Nakuparan naman si Macapagal-Arroyo sa pagpapatupad ni dating Department of Agriculture (DA) Sec. Leonardo Montemayor ng mga programang maka-“globa-

lisasyon” na gustong pabonggahin ng Malakanyang. Kaya ang ibayong pagtataguyod ng imperyalistang “globalisasyon” sa agrikultura at ng interes ng malalaking dayuhang agribisnes ang lalamnin ng programa ng bagong kalihim ng DA.

Ang ipinalit kay Montemayor, si Luis Lorenzo Jr., ay isang malaking kumprador—tagapangulo ng Del Monte Philippines Inc. (isang Amerikanong kumpanyang agribisnes), Lapanday Foods Corp. (may negosyo sa eksport ng mga produktong agrikultural) at marami pang iba. Kasapi siya ng World Trade Organization (WTO) Advisory at ASEAN Free Trade Advisory (AFTA). Bilang presidente ng Philippine Rice Research Institute, pinangunahan niya ang pagpapalaganap ng mga uri ng binhing palay na lubos na nakaasa sa mga komersyal na pestisidyo.

Isa ring maasahang propagandista ni Macapagal-Arroyo si Lorenzo. Noong Agosto, binayaran niya ng \$1 milyon ang Burston & Marsteller, isang kumpanya para sa pampublikong relasyon, upang pabanguhin si Macapagal-Arroyo sa US. Nitong huli, buong kasinungalingan niyang ipinaghahambog na tagumpay ang programa ng rehimen para sa pagpapasulpot ng isang milyong trabaho gayong isa itong napakalaking kapalpakan. **AB**



Mga paglabag sa karapatang-tao

(Oktubre-Disyembre 2002)

Isang libo, limandaan apatnapu't lima (1,545) nang kaso ng paglabag sa karapatang-tao ang naitala ng Karapatan mula nang maging presidente si Gloria Macapagal-Arroyo. Pitumpung porsyento (70%) ng mga ito ay kagagawan ng militar, 13% ng PNP at ang iba pa ay kagagawan ng *goons*, mga vigilante at iba pang grupo. Sumusunod ang pinakahuling mga kaso:

DISYEMBRE 5. Animnapu't anim katao ang iligal na inaresto at ipiniit ng mga pulis at militar sa Sablayan, Occidental Mindoro. Inaresto sina Andrew Mendoza, tagapangulo ng Unyon ng Manggagawang Bukid sa Occidental Mindoro at Pastor Rodel Gregorio, prubinsyal na tagapangulo ng KARAPATAN habang namamahagi ng mga polyeto para sa P15 pagtaas sa presyo ng palay. Sila at 14 pang myembro ng Anakbayan ay pinagbintangang mga myembro ng Bagong Hukbong Bayan at kinasuhan ng sedisyon.



Noong Nobyembre 22, dinukot bandang alas-11 ng gabi sina Victor Saducos at Arsenio Manalo ng mga lalaking nakaunipormeng militar at armado ng M14 at M16. Hindi pa sila natatagpuan hanggang ngayon at pinaniniwalaang patay na. Bago ito, dinukot sa naturan ding barangay si Anthony Martinez, 37, lider ng Nagkakaisang Mamamayan ng Puerto Galera. Natagpuan ang pugot na ulo ni Martinez sa Barangay Km. 37 at ang kanyang katawan sa Barangay Villaflor.

NOBYEMBRE 22-23. Limang myembro ng PAMALAKAYA na pawang residente ng Puerto Galera, Oriental Mindoro ang pinatay ng mga pinaghihinalang sundalo, ayon sa militanteng grupo ng mga mangingisda. Si Oscar Sacdalan, 48, taga-Sityo Hulo, Barangay Tabinay Maliit ay dinukot ng mga lalaking nakabonet at nakaunipormeng militar bandang 2:30 ng madaling araw sa kanyang bahay noong Nobyembre 23, dinala sa labas at doon pinagbabaril. Pinatay din noong araw na iyon si Vedaso Lalong-isip, 58, ng Barangay Talipanan.

NOBYEMBRE 14. Inilantad ng Task Force Tapaz (TFT), isang *fact-finding mission* na inilunsad noong Oktubre 7-11 ng KARAPATAN Panay, na laganap ang mga abusong militar laban sa mga tribong Tumandok-Sulodnon sa Tapaz, Capiz. Tinukoy ng TFT na ang mga kaso ng paglabag sa karapatang-tao ay kagagawan ng mga tropa ng 12th IB at Division Strike Coy ng 3rd ID ng Philippine Army. Sinang-ayunan ni Victor Tanco, bise gobernador ng Capiz at ng Sangguniang Panlalawigan ang ulat ng TFT.



Kabilang sa mga paglabag ang pagsira ng mga pananim habang naglulunsad ng mga operasyong militar, sapilitang rekrutment sa Citizens Armed Forces Geographical Unit (CAFGU), pagpataw ng *curfew*, at paggawang detatsment ng mga bahay ng masa sa baryo. Partikular sa Daan Sur, na may malaking konsentrasyon ng militar, kinakabitang mga granada ang mga bahay at daanan tuwing gabi, bagay na naglalagay sa panganib sa buhay ng mga sibilyan.

OKTUBRE 13 HANGGANG NOBYEMBRE 12. Anim na kaso ng pagdukot at panghaharas ng pulis, militar at paramilitar sa mga kasapi ng midya ang naitala sa panahong ito, ayon sa National Union of Journalists in the Philippines (NUJP). Ayon pa sa NUJP, karamihan dito ay naganap sa mga prubinsya—apat sa Kabisayaan, isa sa Timog Katagalugan at ang isa ay nangyari sa isang reporter sa Malakanyang. Ang mga dinukot na tagamidya ay sina

Edmund Sestoso ng DYSR, Dumaguete City at Lloyd Wilson Sato ng CEGP sa Cebu City. Pinagbantaan naman at binugbog ng *goons* ni Bobby Cuenca, isang panginoong maylupa, si Carl Vanzales ng *Visayas Daily Courier* sa Bacolod City at ang *crew* ng ABS-CBN sa Bacolod na sina Joel Saracho at Edmund Lasala. Kabilang sa mga pinakahuling kaso ang *harassment*



noong Nobyembre 8 kay Edu Paringit, isang *cameraman* ng TVNet, lokal na istasyon ng telebisyon sa Calapan City, Oriental Mindoro. Si Paringit ay pinaratanangang myembro ng BHB ni Col. Jovito Palparan, kumander ng 204th IBde dahil sa pagko-ber niya ng marahas na demolisyon ng mga kabahayan sa lunsod.

Mas maaga pa nitong 2002, tatlong mamamahayag ang pinatay, tatlong iba pa ang dinukot at marami pang binantaan dahil lamang sa paglalabas ng mga ulat laban sa militar at sa rehimeng Macapagal-Arroyo.

NOBYEMBRE 11. Binihag at tinortyur ng mga tropa ng 61st IB ang mga magsasakang sina Moises Arcadenña, 62; ang kanyang mga anak na sina Eddie, Ely at Moreto; at sina Marcelito Romano at Demetrio Bitongga matapos maganap ang isang engkwentro sa pagitan ng BHB at Philippine Army sa Barangay Manlocahoc, Sipalay City. Inakusahan ng militar ang mga hinuli na may kinalaman sa engkwentrong nagaganap.

Itinali ang mga paa at kamay ng mga biktima at pilit silang pinaaaming mga tagasuporta ng BHB. Pinagbubugbog sila. Makailang ulit na kinulata at hinampas ng kahoy si Moises. Hiniwa ng kutsilyo ang balikat ni Moreto. Pinaso ng pinainit na lata ang katawan nila. Pinagsisipa naman ng mga abusado sina Eddie at Ely.

Sapilitan ding ginawang giya sina Romano at Bitongga. Sa pag-

hahanap sa yunit ng BHB, kinaladkad sila sa mabatong sapa at makailang ulit na inilubog sa tubig ang kanilang mga ulo. Sapilitan ding ginawang giya ng mga militar ang anak ni Moreto na si Sammy.

Hinaras naman ng mga sundalo ang mag-asawang sina Rodolfo at Gina Baylosis. Hinalughog ang tahanan ng isang Moreto Paborada. Ayon sa kan-

ya, pinagpupunit ng mga militar ang mahahalaga nilang papeles kabilang ang mga *birth certificate*, *marriage certificate*, diploma at mga dokumento ng kanyang kalabaw at motorsiklo. Ninakaw pa ng mga sundalo ang P500 nakatago sa aparador ng pamilya.

Sa takot na bumalik ang mga militar, natigil sa pagsasaka ang mga biktima at kanilang mga pamilya.


NOBYEMBRE 10. Si Loreto Macalangan, pastor ng UCCP, ay pinatay ng isang pinaghihinalang sundalo habang nagmimisa sa Barangay Upper Ticulon, Malita, Davao del Sur. Mariing tinututulan ni Macalangan ang pagbubuo ng CAFGU sa kanilang barangay.

NOBYEMBRE 8. Winasak ng mga pulis at militar ang 32 kabahayan sa Bagong Pook, San Vicente South, Calapan City pagkatapos ng dalawang bigong pagtatangka noong Pebrero at Marso. Natuloy lamang ang demolisyon nang tinambakan ng pulis, militar, at mga bayarang

goons ang lugar. May ipinusisyon ding mga tangke ng Philippine Army malapit sa lugar ng demolisyon.

OKTUBRE 20. Pinatay ng limang sundalo ng 78th IB si Agustin Abile, isang binatilyo, sa Tabuelan, Cebu habang ito'y nag-aabang ng sasakyan malapit sa detachment ng militar. Inakusahan ng militar si Abile na isang "rebeldeng komunista" na nagtangkang mang-agaw ng baril ng isang sundalo kaya siya pinatay. Pinabulaanan ito ng mga magulang ni Abile. Anila, imposibleng maging myembro ng BHB ang kanilang anak dahil ito ay may kapansanan sa pag-iisip. Nagsampa na ng kaso ng pagpatay ang mga magulang ni Abile laban sa militar.

OKTUBRE 12. Anim katao, kabilang ang dalawang *coordinator* ng Bayan Muna (BM), ang hinuli at ininteroga ng militar sa Barangay San Rafael, Rodriguez, Rizal habang sila'y nagpupulong. Ang mga hinuli ay sina Mario Bungkaras, Virgilio Andrade, Laila Rivera at Analisa Elis at mga taga-BM na sina Crisaldo Bautista at Ofelia Duldulao. Ininteroga sila dahil sa diumano'y mga "kontra-gubyrnong aktibidad" nila. Sina Bautista at Duldulao ay pinakawalan na lamang noong hatinggabi ng Oktubre 12 habang ang natirang apat pa ay pinauwi noong Oktubre 13, bandang alas-2 nang madaling araw. Nagsampa ng kasong ilegal na detensyon ang mga biktima laban sa militar. **AB**



Ang lumulubhang krisis pampulitika sa Venezuela

Humantong na sa matinding polarisasyon ang pampulitikang krisis sa Venezuela. Nasa isang panig si Hugo Chavez, presidente ng bansa na pumupusisyon laban sa mga neoliberal na patakarang dikta ng imperyalismong US. Sa kabilang panig naman ay ang malalaking negosyante at panginoong maylupang nakikinabang sa gayong mga patakaran.

Ginagamit ng mga kalaban ni Chavez ang lahat ng rekursong upang mapataksik ang presidente. Mula maagang bahagi ng 2002, hindi sila naglubay sa pag-oorganisa ng mga aksyong protesta laban sa guberno. Noong Abril, saglit nilang napatalsik si Chavez sa pamamagitan ng isang kudatang suportado ng US. Kaagad ring nakabalik sa pwesto si Chavez matapos ang malawakang mga demonstrasyong nagbunsod ng kontra-kudeta.

Simula noong Oktubre 22, inokupa ng mga pwersang anti-Chavez, kabilang ang isang paksyon ng mga upisyal militar, ang isang plaza sa Caracas, kabisera ng bansa. Sinimulan ng oposisyon ang isang pangkalahatang welga nitong Disyembre 2 at humantong na ito sa isang insidente ng karahasan nitong Disyembre 6.

Umiigting ang tunggalian ng dalawang panig at laganap ang pangambang humantong ito sa gera sibil.


Puno't dulo

Mula nang mahalal noong 1998, niyanig ni Chavez ang tradisyunal na pulitika sa Venezuela sa pamamagitan ng programang tinagurian niyang “Rebolusyong Bo-

livarian” na nangangakong babaligtarin ang tagibang na distribusyon ng yaman ng bansa (*Tingnan ang kaugnay na artikulo sa pahina 13*). Ang Venezuela ang panlimang pinakamalaking prodyuser ng petrolyo sa daigdig ngunit naghihirap ang humigit-kumulang 80% ng mamamayan nito dahil sa imperyalistang dominasyon.

Nagsimulang kumulo ang pampulitikang salpukan noong Nobyembre 2001 nang magpatibay ang kongreso ng Venezuela ng 49 na batas na nakatuon laban sa “malayang pamilihan”, oligarkiya sa ekonomya at korapsyon. Ang naturang mga batas ang unang mapagpasyang hakbang ng gubyernong Chavez para ipatupad ang mga prubisyon ng konstitusyong pinagtibay noong 1999.

Malawak ang suportang tinatamasa ni Chavez laluna mula sa mahihirap na mamamayang Venezuelano dahil sinasalamang kanyang paninindigan laban sa imperyalistang globalisasyon ang mala-



Ang Venezuela ay isa sa mga bansa sa South America na nagrebolusyon laban sa kolonyalismong Espanyol sa pamumuno ni Simon Bolivar. Lumaya ito mula sa mga Espanyol noong 1821.

wak na sentimyento ng mamamayang lubos na biniktima nito. Gayunman, ilang seksyon din ng mamamayan ang nagpapahayag ng diskuntento dulot ng malubhang krisis sa ekonomya. Ito ang sinasamantala ng US at ng bahagi ng naghaharing uri na hindi nasisiyahan sa kanyang populistang pagpopostura.

Interes ng US

Partikular na interes ng US sa Venezuela ang pribatisasyon ng industriya ng langis sa bansa upang mapasok at mahawakan ito ng malalaking kumpanyang multinasyunal ng US. Ang Venezuela ang pang-apat na pinakamalaking pinagkukunan ng US ng imported na langis.

Tumatanggi si Chavez na ipailalim sa US ang ekonomya at pulitika ng bansa. Kaya naman

tuluy-tuloy na pinaghahandaan ng US ang pagpapatal-sik sa kanya sa anumang paraan, upang makapaglagay ng papet na rehimen at maitransporma ang bansa tungo sa isang malakolonya.

Gayunman, bahagyang nagtitimpi ang US sa matinding pagtutol kay Chavez sa kasalukuyang kalagayang nakatuon ang atensyon nito sa balak na pag-atake sa Iraq. Taliwas sa interes ng US ang pagsiklab ng iba pang kaguluhang makagagambala sa suplay ng langis at magpapataas sa presyo nito. Kagyat na nais ng US ang paghupa ng pampulitikang tensyon sa Venezuela upang maiwasan ang muling pagtungo nito sa marahas na kumprontasyon. Anumang paglubha ng kalagayan dito ay tiyak na makaaapekto sa ekonomya ng US.

Alinsunod rito, binalaan ng US ang magkabilang panig na huwag gagawa ng mga hakbanging “di-konstitusyunal”. Tutol umano ito kapwa sa “pagpapatal-sik sa guberno at sa pananatili nito sa poder sa paraang labag sa konstitusyon”. Sinisikap ng US na rendahan ang oposisyon dahil tantyado nitong malakas pa ang popular na suportang tinatamasa ni Chavez.

Ngunit pansamantala lamang ang pagtitimpi ng US. Lalo ngayong mahalaga para kay Chavez ang patuloy na suporta ng nakararaming mamamayang Venezuelang siyang tunay na susi sa pananatili at katatagan ng kanyang rehimen. Mapanghawakan ni Chavez ang susing ito kung paninindigan niya ang kan-

yang mga anti-imperyalistang deklarasyon at mapagpasya niyang patutunayan ang panlipunang pagbabagong kanyang ipinangako. **AB**

Si Hugo Chavez at ang kanyang “Rebolusyong Bolivarian”

SI PRESIDENTE HUGO CHAVEZ AY DATING TINYENTE koronel sa Venezuelan Army. Una siyang tumampok sa internasyunal na balita noong Pebrero 1992 nang pamunuan niya ang isang kudeta upang ibagsak ang dating pangulong si Andres Perez.



Nabilanggo si Chavez matapos ang bigong kudeta at pinalaya rin noong 1994 nang mapatal-sik sa pamamagitan ng *impeachment* si Perez.

Noong 1997, binuo ni Chavez ang kanyang partidong Fifth Republic Movement. Tumakbo siya sa pagkapangulo noong 1998 at nagtamo ng 56% ng mga boto.

Pinalitan niya ang konstitusyon ng Venezuela at nireorganisa ang kongreso at mga hukuman upang konsolidahin ang tinagurian niyang “Rebolusyong Bolivarian” noong 1999. Ipinangalan niya ang kanyang kilusan kay Simon Bolivar, lider ng rebolusyon sa South America laban sa kolonyalismong Espanyol noong ika-19 na siglo.

Pinakatampok na hakbang ni Chavez bilang pangulo ang pagpapalaki ng badyet para sa mga proyekto laban sa kahirapan. Inilunsad niya ang programang Plan Bolivar 2000 kung saan minobilisa niya ang sandatahang lakas upang maghatid ng mga serbisyong panlipunan sa pinakamahirap na seksyon ng populasyon. Inorganisa niya ang mga komunidad sa mga komiteng tinaguriang “Bolivarian Circles” at pinakikilos ang mga ito para sa kanyang programa.

Matingkad ang burges-nasyunalistang kiling ni Chavez. Mahigpit siyang kritiko ng imperyalistang globalisasyon at ng pagsasamantala at maluhong pamumuhay ng malalaking negosyante sa Venezuela. Kabilang sa mga pangunahing tinututulan ng kanyang mga kalaban ang pagpapahigpit niya ng kontrol sa Petroleos de Venezuela (PDVSA) sa pamamagitan ng pagpapalit sa pamunuan nito. Ang PDVSA, kumpanya ng langis na pag-aari ng estado, ang pinagmumulan ng humigit-kumulang 75% ng kita ng Venezuela mula sa eksport.

Taliwas naman sa interes ng US, iginigiit ni Chavez ang mahigpit na pagtalima ng mga myembro ng Organization of Petroleum Exporting Countries sa pagkontrol sa produksyon ng langis. Lalo siyang pinaginitan ng US mula noong batikusin niya ang gera nito laban sa Afghanistan at ang pang-uupat nito laban sa Iraq. Hindi rin nasisiyahan ang US sa pakikipag-ugnayan niya sa Cuba, Iraq, Iran at Libya. **AB**

Afghanistan: Isang taon ng pananakop

Binabayo ng matinding krisis pampolitika ang papet na rehimeng Karzai sa Afghanistan. Taliwas ito sa propaganda ng US at United Kingdom (UK) na malaya at tahimik na ang Afghanistan matapos mapatalsik ng pinagsanib na pwersang Amerikano at British ang Taliban noong nakaraang taon. Mula pa noong kasagsagan ng gera ng US sa Afghanistan, ang namamayani sa bansa ay karahasan ng mga tropang mananakop na nilalabanan sa pamamagitan ng mga armado at di armadong pagkilos ng mamamayan. Nitong huli, tumampok ang madugong mga demonstrasyon laban sa rehimen ni Prime Minister Hamid Karzai at sa mga dayuhang mananakop. Ang Kabul, kabisera ng Afghanistan, ang sentro ng mararahas at madudugong kumprontasyon.

Ipinamamalas ng kaguluhang ito ang malawak na disgusto ng mamamayan sa maka-imperyalista at kontra-mamamayang guberno ni Karzai. Pinatatampok din nito ang masidhing alitan sa loob ng Northern Alliance, ang alyansa ng

mga *warlord* at *druglord* na kinasangkapan ng US upang sakupin ang Afghanistan.

Tampok dito ang pag-usbong ng nagsasariling kilusang masa na lantarang tumututol sa paghahari ng US at ng papet nitong si Karzai.

Pinag-aalab ang damdaming patriyotiko ng mamamayan dahil sa laganap na mga pang-aabuso ng dayuhang mananakop. Sa Kabul at iba't ibang bahagi ng Afghanistan, sumisiklab ang mga protesta laban sa pambobomba ng US. Mayroon na ring mga demonstrasyon laban sa guberno sa iba pang bahagi ng bansa.

Ribalang pampolitika

Habang tumatagal, lalong sumisidhi ang alitan ng naghaharing paksyong iniluklok ng US. Sa loob ng isang taon, dalawang matataas na upisyal ng papet na rehimeng Karzai ang pinatay. Noong Pebrero 14, binaril si Transport and Tour-


Ang bangis ng mga tropang US sa Afghanistan

Marami ang nagrereklamo tungkol sa mga abuso ng US Special Forces sa Afghanistan, hindi lamang mula sa mga lokal na upisyal ng guberno kundi pati sa mga *humanitarian aid worker* at mga *diplomat* mula sa US at Europe. Kabilang sa mga abuso ang mga pagmamalabis sa mamamayan habang hinahalughog ang mga bahay ng mga pinagsususpetsahang simpatisador ng al Qaida. Bunga nito, nag-aarmas ang mga sibilyan at madalas pumutok ang mga sagupaan sa pagitan nila at ng mga pwersang koalisyon. Sa katunayan, inaamin ng mga kumander na Amerikano na takot silang magpatrulya lampas sa perimetro ng Kabul, laluna sa gabi. Sa ngayon, may mga itinalagang babaeng upisyal militar upang magrekisa sa mga babaeng Afghan na pinaghihinalaang nagpapalusot ng mga armas at eksplosibo sa mga gerilya.

Ang mga nabanggit na mga pang-aabusong militar ay bukod pa sa madalas na insidente ng pag-

iistraping ng mga helikopter ng US sa mga sibilyan tulad halimbawa ng pagmasaker sa mga sibilyang dumadalo sa isang kasalan sa Uruzgan noong Hulyo 1, na ikinamatay ng 48 Afghan at ikinasugat ng 117. Pinawalang-sala ang mga sundalong may kagagawan nito.

Isa pang halimbawa ang malupit na pagtrato ng US Special Forces sa daan-daang mga bihag na Taliban na ikinulong sa mga *container van* nang walang pagkain ni tubig, at walang hanging tumatagos kung di sa iilang butas lamang. Nangamatay halos lahat ng mga bihag habang binabagtas ng mga *container van* ang kalagitnaan ng disyerto. **AB**



ism Minister Abdul Rahman. Noon namang Hulyo 6, pinatay si Abdul Qadir, isa sa mga bise presidente ng gabinete ng Karzai. Makailang beses na ring pinagtangkaan ang buhay ni Karzai. Laganap ang paniniwalang pakana ang mga ito ng iba pang paksyon sa loob ng Northern Alliance na malaon nang gustong patalsikin si Karzai. Dahil sa takot, hiniling ni Karzai sa US na bigyan siya ng mga badigard mula sa US Special Forces.

Habang marahas ang hidwaan ng maraming paksyong pulitikal, nangangamba naman, laluna ang mga kumander ng pwersang US, sa napabalitang

pagtitipon ng lakas ng mga labi ng pwersang Taliban at al Qaida at patriyotikong pwersang gerilya ni Gulbuddin Hekmatyar sa may timog na hangganan ng Afghanistan at Pakistan. Kontrolado ng mga Pashtun (baseng tribo ng Taliban) ang naturang mga lugar. Malaon nang tinututulan ng mga Pashtun ang pamahalaang Karzai dahil sa ipinapakita at inaasal nitong kalupitan at karahasan laban sa kanila. Bagamat Pashtun si Karzai, dominado ng mga Tajik, isang minoryang tribo, ang kanyang gubyerno. Ang Pashtun, na siyang mayoryang tribo, ay walang tunay na representasyon sa gubyerno. **AB**

Ika-16 kongreso ng rebisyunistang PKT

Ibayong konsolidasyon ng kapitalistang panunumbalik sa China

Muling ipinakita ng nagdaang ika-16 na kongreso ng rebisyunistang Partido Komunista ng Tsina (PKT) nitong Nobyembre 2002 na ganap nang nangibabaw dito ang burgesya at nanumbalik na ang kapitalismo sa China.

Ang pinakatampok na mga resolusyong pinagtibay sa kongreso ay pawang nakatuon sa tahasang pagpapapasok ng burgesya sa PKT hanggang sa pamunuan nito at ang pagpapalago at pagpapalaki ng papel o bahagi ng pribadong kapital at dayuhang pamumuhunan sa buhay-ekonomya ng China.

Taliwas na taliwas sa wastong linya ng nagpapatuloy na rebolusyon sa ilalim ng diktadura ng proletaryado, idineklara ni Jiang Zemin na ang mga kapitalista ay mga "katuwang sa pagtatayo ng sosyalismong may katangiang Tsino". Sa kauna-unahang pagkakataon, dumalo ang malalaking

kapitalista bilang mga upisyal na delegado sa kongreso ng PKT.

Ang natititira pang mga sosyalistang pamana sa China ay lubusan nang binabaklas upang bigyangpuwang ang tuluyang paglawak ng kapitalismo.

Pinagtibay sa kongreso ang mga resolusyong nagpapahintulot sa pagpasok ng mga pribadong negosyo sa mas maraming sektor ng ekonomya, gayundin ang pag-aalis sa mga regulasyong pumipigil sa paglago nito. Pinagtibay rin nito ang pangangailangan ng ibayong ligal na proteksyon para sa pribadong pag-aari, gayundin, ang pagbibigay-daan sa pantay na kumpeti-

syon ng pribadong negosyo at mga empresang "pag-aari ng estado".

Upang patuloy na palabasing "sosyalista" ang China, idineklara ng PKT na mananatili ang "dominanteng papel" ng "sektor ng estado". Subalit ang katotohana'y patuloy na lumiliit ito sa pamamagitan ng pribatisasyon na nagsimula noon pang kalagitnaan ng dekada 1990. Baluktot na idineklara ng PKT noon pang 1997 na ang "pag-aaring estado ay maaaring matamo sa pamamagitan ng mayorya o kahit minoryang pag-aari sa mga kumpanya, sa halip na isandaang porsyentong pag-aari".

Higit na ipinangingibabaw sa PKT ang interes ng burgesya. Kakibat nito'y tuluyan nang naisaisantabi ang kapakanan ng mga manggagawa at magsasaka na nga-yo'y dumaranas ng papalalang kahirapan laluna sa malawak na kanayunang, disempleyo, paglawak ng agwat sa pagitan ng iilang yumayamang kapitalista at dumaraming maralita, pag-aalis ng pensyon at serbisyong panlipunan, pagtaas ng presyo ng bilingin, korapsyon, paglaganap ng dekadenteng kultura at mga gawi at iba pang kasamaan ng kapitalistang sistema. **AB**

ALOK NI TIGLAO, TINANGGIHAN NINA TIAMZON, AUSTRIA

TUWIRANG tinanggihan noong Nobyembre 13 nina Kasamang Benito Tiamzon at Wilma Austria ang pakunwaring alok ni Rigoberto Tiglao, tagapagsalita ni Macapagal-Arroyo, na “mag-usap hinggil sa kapayapaan”.

Idiniin ng mag-asawang lider ng Partido Komunista ng Pilipinas na ang naturang alok ay “mumurahing pagbatikos sa rebolusyonaryong kilusan at mga pinuno nito, pangunahin na kay Kasamang Jose Ma. Sison, at pangungutya sa aming patuloy at walang alinlangang komitment sa demokrati-kong pakikibaka ng sambayanan.”

Binalewala nina Kasamang Tiamzon at Austria ang kunwa’y pagkahabag ni Tiglao sa kanilang “matatanda at sakitin na” sa pagsabing “ang pagiging kapiling ng masa sa pakikibaka upang ibagsak ang mapang-api at mapagsamantalang sistema ay nagpapalakas sa aming rebolusyonaryong buhay at sigla.”

“Pinakamababa ang pagpapahalaga ngayon ni Tiglao sa kapayapaan man o sa pakikipagkaibigan habang dibdiban na niyang katrabaho ang klase nina Blas Ople, Angelo Reyes at Roilo Golez sa pagpapakulo ng saywar, pagpapa-

sama sa rebolusyonaryong kilusan, pagwasak sa usapang pangkapayapaan at pagpapatindi sa armadong kontra-rebolusyong may papalaking lantaran at pailalim na tulong at interbensyon ng mga pwersang US,” dagdag pa ng mag-asawa.

Nilinaw nina Kasamang Tiamzon at Austria na “seryoso at sinsero” ang mga pagsisikap ng rebolusyonaryong kilusan na isulong ang prosesong pangkapayapaan. Muli nilang iginiit na “naranapat lamang sumunod sa mga kasunduang nilagdaan ng GRP at NDFP simula pa noong 1992 hinggil sa kondukta ng usapang pangkapayapaan.”



PAGPAPATULOY NG USAPANG PANGKAPAYAPAHAN, IGINIIT

IGINIGIIT ng mga taong simbahan at iba pang sektor ang pagbabalik sa negosasyong pangkapayapaan ng GRP at NDFP.

Sa isang pagtitipon ng mga tagapagtaguyod ng kapayapaan at karapatang-tao sa UP Asian Center noong Nobyembre 20, ipinana-wagan ito ni Bishop Julio Labayen, dating tagapangulo ng Ecumenical Bishops Forum, sa isang petisyong pinamagatang “Resume Formal Peace Talks Now!”. Ang pahayag ay pinirmahan ng iba’t ibang obispong Protestante at Katoliko at ng libu-libong mamamayan.

Ito rin ang ipinanawagan noong Nobyembre 14 ng Pampanga Mayors’ League at ng Bishops and Ulama Forum sa Mindanao.

SAKBAYAN INILUNSAK SA TIMOG KATAGALUGAN

ISANG tatlong araw na Sakay Lakbay ng Mamamayan (Sakbayan) ang inilunsad nitong Disyembre 8 sa Lucena City para ilantad at batikusin ang malawakang paglabag sa karapatang-tao sa Timog Katagalugan. Mahigit 300 aktibista ang sumama sa Sakbayan.

Ayon sa Tanggol Karapatan na nanguna sa *protest caravan*, di bababa sa 967 kaso ng paglabag sa karapatang-tao ang naitala na sa

Timog Katagalugan mula nang maluklok sa poder si Gloria Macapagal-Arroyo. Biniktima nito ang di bababa sa 1,558 pamilya at 2,893 indibidwal. Ang pinakabugbog sa mga abusong militar ay ang Oriental Mindoro at Quezon.

Dinala ang *protest caravan* sa mga upisina ng Department of National Defense at Commission on Human Rights nitong Disyembre 9.

MGA MANGGAGAWA NG NAPOCOR, NAGPROTESTA

NAGLUNSAK ng serye ng mga aksyong protesta laban sa magang implementasyon ng planong pagreistratura ang mga manggagawa at empleyado ng NAPOCOR simula Disyembre 2. Nilahukan ito ng tatlong unyon—NAPOCOR Employees and Workers’ Union, NAPOCOR Employees Consolidated Union at Executive Associa-

tion. Tinututulan nila ang planong pagsibak sa 3,270 manggagawa sa ng ahensya sa darating na Enero. Ang planong *restructuring* ay panimulang hakbang tungo sa ganap na pribatisasyon ng korporasyon.

Sinuportahan ng mga manggagawa sa iba’t ibang upisina ng NAPOCOR sa buong bansa ang mga naturang kilos-protesta.

MGA MANGGAGAWA NG PHILIPPINE RABBIT, NAGWELGA

DALAWANG linggong nagwelga ang mga drayber, konduktor at iba pang manggagawa ng Philippine Rabbit Bus Line mula Oktubre 30 hanggang Nobyembre 11.

Binatikos nila ang tahasang paglabag ng kumpanya sa kanilang *collective bargaining agreement*; ang pagtanggihan nitong makipag-usap sa kanilang unyon;

sobrang *withholding tax* at di pagbabayad ng kanilang mga benepisyo. Inireklamo rin nila ang ilegal na pagsipat at pagsuspende sa mga unyonista. Wala rin sa minimum ang arawang sahod ng mga drayber ng kumpanya. Mahigit P200 lamang bawat araw ang natatanggap nila gayong kumikita ang kumpanya ng P14,000 kada bus araw-araw.

RAPID DEPLOYMENT FORCE NG AFP, BUBUIN NG U.S.

SA layuning pag-ibayuhin ang panghihimasok sa kontra-rebolusyonaryong digma sa Pilipinas, isang Rapid Deployment Force (RDF) ang planong buuin ng US sa loob ng AFP. Ang naturang pwersa ay oorganisahin, sasanayin at aarmanan ng US para labanan ang

rebolusyonaryong kilusan at ang MILF. Gagamitin din umano ang pwersa para sa agresyon at panghihimasok ng US sa Asia at iba pang dako ng mundo.

Ang pagbubuo ng RDF, na kasalukuyan pang inililihim ng rehimen, ay bukod pa sa pagbubuo

ng mga Light Reaction Company (LRC) na binibigyan ng US ng pagsasanay sa malapitang kombatan isnayping. Dalawang LRC na ang sinanay ng US. Nakatakda itong magsanay ng dalawa pang LRC at 16 na Light Infantry Company sa 2003.

AUSTRALIA, NAG-AASTANG KINATAWAN NG U.S. SA ASIA-PACIFIC

NAGWALA si John Howard, maka-Kanang *prime minister* ng Australia, bilang reaksiyon sa teroristang pagbomba sa Bali, Indonesia noong Oktubre 12, kung saan halos 200 turista ang namatay, na karamiha'y mga Australian. Pinag-iibayo niya ngayon ang pagpapatupad ng mga rasista at mapanupil na patakaran sa mga migranteng Indonesian sa Australia. Walang pakundangan ang pangrereyd sa kanilang mga bahay, pagpapahirap, panghaharas at iba pang anyo ng pang-aapi.

Hindi makuntento rito, nagpapanukala pa si Howard na maglunsad ang Australia ng mga unilateral na *preemptive strike* (o pamigil na pagbira) laban umano sa mga terorista saanmang bansa sa Asia. Aniya'y kailangang baguhin ang saligang batas ng United Nations upang mapahintulutan ang gayong mga pamigil na bira.

Ang panukala ni Howard ay mas tahasang pag-uulit sa mga sinasabi at aktwal nang ipinatutupad ng namumunong imperyalistang si Presidente

George W. Bush ng US. Kaya naman agad sinangayunan at sinuhayan pa ni Bush ang pinagsasabi ng kanyang tagapagsalita at kinatawan sa Asia-Pacific.

Umalma ang mga bansa sa Southeast Asia sa arogante at astang-matong panukala ni Howard. Pinakamabagsik ang batikos ni Malaysian Prime Minister Mahathir Mohamad. Aniya, kapag may namatay sa Malaysia dahil sa kagagawan ng Australia, ituturing nila itong isang akto ng panggegera at gagawa sila ng aksyon alinsunod sa kanilang mga batas para ipagtanggol ang soberanya at kasarinlan ng Malaysia.

Sa harap ng garapal at aroganteng pahayag ni Howard, pati si Foreign Affairs Sec. Blas Ople ay naobligang pakitang-taong bumatikos sa "makahegemonyang ambisyon" ng Australia. Subalit pabalat-bunga lamang ito dahil ang gayundin namang gawain ng US sa Pilipinas ay todo-todong itinataguyod niya at ng pinaglilingkuran niyang gubyernong Arroyo.

DEPOSIT SA BADYET AT UTANG NG BANSA, MULING LUMOBO; EKONOMYA, BAGSAK ANG GRADO

UMABOT na sa P187 bilyon ang deposit sa badyet ng bansa sa katapusan pa lamang ng Oktubre at inaasahan pang lalong lolobo sa P223 bilyon sa katapusan ng 2002. Mas mataas ito sa unang pagtaya ng rehimen na P130 bilyon lamang na deposit ngayong taon.

Ayon kay Finance Sec. Jose Isidro Camacho, ang pagbabayad sa utang ng bansa ang pinakamalaking dahilan sa pangungutang na siyang nagpapalobo sa deposit sa badyet. Ayon pa sa kanya, nagkaroon ng sarplas ang rehimeng Macapagal-Arroyo sa unang taon nito. Lumaki lamang ang deposit sa badyet sa katapusan ng 2001 dahil sa pagbabayad ng interes ng utang panlabas. Nitong taon, P34.8 bilyon ang sarplas sa gastos ng gubyrerno ngunit umaabot sa mahigit P200 bilyon ang deposit sa badyet dahil din sa pagbabayad sa interes.

Sa kwenta ni Camacho, P2.716 trilyon na ang kabuuang utang ng bansa noong Setyembre. Mas mataas ito nang 17% kaysa noong nakaraang taon. Umabot na sa P1.412 trilyon ang lokal na utang at

P1.304 trilyon naman ang utang panlabas. Ngunit ayon kay Sen. Ralph Recto, sa aktwal ay nasa P3.26 trilyon na ang pangkabuuang pambansang utang. Marapat umanong isama sa kalkulasyon ang P535 bilyong inutang at mga ginarantiyahang utang ng gubyrerno para sa mga proyekto ng mga pribadong korporasyon sa ilalim ng iskemang *build-operate-transfer*. Upang mabayaran ang interes nito, kinalailangang magpasulpot ang gubyrerno ng P411.47 bilyon sa susunod na taon. Ayon pa kay Recto, ibayong sisidhi ang krisis sa pangungutang ng bansa, lalupa't mas mababa ang inaasahang makukulektang buwis sa 2003.

Dahil sa lumolobong deposit sa badyet ng bansa, bagsak ang ibinigay na grado sa ekonomya ng Pilipinas ng Fitch, isang institusyon ng mga mamumuhunan na nakabase sa London. Noong Oktubre, bagsak ding grado sa ekonomya ang ibinigay sa bansa ng Standard and Poor's. Binalaan nila ang mga dayuhang korporasyon laban sa pamumuhunan sa bansa.

KASO NG IBALOI LABAN SA CAMP JOHN HAY, ISINAMPA SA U.N.

NAGSAMPA ng kaso sa United Nations (UN) Commission on Human Rights nitong Disyembre 5 ang mga tagapagmana ni Mateo Cariño, isang Ibaloi at dating lider ng Katipunan sa Kordilyera, para bawiin ang 148 ektaryang kagubatang bahagi ngayon ng Camp John

Hay *forest reservation* sa Baguio City.

Naipanalo ni Cariño noong 1909 ang unang kasong isinampa niya laban sa kolonyal na gubyrerno ng US para bawiin ang lupa subalit hindi ipinatupad ang desisyong ito. Mas masahol pa, tinayuan ang lupa

ng isang pahingahan ng mga upisyal-militar ng US, ang Camp John Hay.

Nang mapatalsik ang mga base at iba pang pasilidad militar ng US sa bansa noong 1991, hindi pa rin ibinalik ng reaksyunaryong gubyrerno ang lupa ng mga Cariño.



MGA ARMADO AT PAMPULITIKANG OPENSIBA, INILUNSA SA NEPAL

KATATAPOS pa lamang ng tatlong-araw na welgang pumaralisa sa Nepal noong Nobyembre 10-12 nang muling sumiklab ang mga taktikal na opensiba ng rebolusyonaryong People's Liberation Army.

Umabot sa 128 tropa ng gubyrerno ang napatay nang salakayin ng mga gerilya ang mga istasyon ng pulisya sa Gurka at Galanga, sa hilagang-kanluran ng

distritong Jumla noong Nobyembre 15. Muling nagkasagupa ang mga ito noong Nobyembre 23.

Bago ito, pinatalsik ni Haring Gyanendra ang mga nahalal na upisyal sa gubyrerno at nagtakda ng panibagong eleksyon sa Nobyembre 11. Hindi natuloy ang eleksyon dahil sinalubong ito ng tatlong araw na welga bilang protesta ng mamamayan.

MGA MANGGAGAWA SA SOUTH KOREA, PANALO LABAN SA BAGONG PATAKARAN SA PAGGAWA

BUNGA ng sunud-sunod na pagkilos ng mga manggagawang Korean, napilitan ang mga mambabatas dito na iatras ang kanilang “panukalang reporma sa paggawa”, na dikta ng patakarang globalisasyon ng WTO.

Binatikos ng Korean Confederation of Trade Unions (KCTU) ang naturang mga “reporma” bilang malaking dagok sa mga pamantayan sa paggawa na

naipagwagi ng kilusang paggawa. Ang KCTU ang namuno sa pag-aaklas ng 120,000 manggagawa mula sa 166 pagawaan at upisina noong Nobyembre 5-7.

Ilan sa mga panukalang tinututulan nila ang limang-araw na paggawa sa isang linggo at kaakibat na pagkakaltas sa sahod. Simula 2004, may balak ding ipatupad ang malawakang tanggalan ng mga manggagawa at empleyado.

MGA PAGKILOS LABAN SA GLOBALISASYON, SUMUSULONG

SA ITALY. Mga 5,000 aktibista ang dumalo sa limang araw na miting ng European Social Forum sa syudad ng Florence noong Nobyembre 5-9. Sa pagtatapos ng pulong, nagmartsa at binatikos nila ang globalisasyon at panunulsol ng gera ng malalaking kapitalistang bansa.

SA FRANCE. Unang kumilos ang mga empleyado ng gubyrno sa buong bansa noong Nobyembre 25. Naglabasan sila at nagdeklara ng pambansang tigil-trabaho. Mga 10,000 sa kanila ang nagmartsa patungong daungan ng Marseilles. Ipinahayag ng mga manggagawa sa koreo, transportasyon, ospital at *utilities* ang kanilang pagtutol sa balak na pribatisasyon na makaaapekto sa kanilang mga sweldo at pensyon. Samantala, nagbarikada ang mga drayber ng trak sa mga mayor na kalsada ng bansa. Nakiisa rin dito ang 50,000 manggagawa ng mga tren.

Bilang suporta sa welga, tumigil sa pagtatrabaho ang mga *air traffic controller* ng Air France noong Nobyembre 26.

SA UNITED KINGDOM. Naglunsad ng walong araw na welga ang mga bumbero mula Nobyembre 25. Iginiit nila ang 19% pagtaas sa kanilang sahod at tinutulan ang pribatisasyon.

SA SOUTH KOREA. Nanawagan ng welga noong Nobyembre 20 ang mga kasapi ng Korean Financial Industry Union laban sa pribatisasyon ng Chohung Bank. Bago ito, noong Nobyembre 13 ay nagsagupaan ang 15,000 raliyista at pulis sa Seoul dahil sa *bank restructuring* at pagbibigay-pribilehiyo sa mga dayuhang negosyo.

MGA PROTESTA LABAN SA GERANG AGRESYON NG U.S., LUMALAWAK

SA ITALY. Isang araw makaarang aprubahan ng United Nations Security Council ang resolusyong nag-eendorso sa mga planong mapandigma ng US, bumuhos sa mga lansangan ng Florence, Italy ang mga demonstrador noong Nobyembre 9. Lumaki ang kanilang bilang mula 500,000 tungong isang milyon habang nagaganap ang martsa. Ito ang pinakamalaking demonstrasyong anti-gera sa Italy.

SA AUSTRALIA. Mahigit 20,000 ang lumahok sa dalawang araw na mga rali-demonstrasyon noong Nobyembre 30 at Disyembre 1 upang suportan ang pagsuporta ng gubyrno rito sa napipintong gera ng US at UK sa Iraq. Ang mga kilos protestang ito na pinamunuan ng alyansa ng mga lider obrero, aktibista at estudyante ay kumalat mula Sydney hanggang sa pito pang lunsod – Adelaide, Canberra, Hobart, Melbourne, Brisbane, Darwin at Perth. Dinaluhan ito ng ilampung libong mga personahe sa pelikula, teatro at telebisyon, taong simbahan, maka-Kaliwang pulitiko at iba pang lider sibiko. Sumama rin ang mga lider ng mga organisasyong Arabo at Muslim sa mga komunidad ng Australia.

Nilagdaan noong Nobyembre 26 ng 318 mambabatas, grupo at organisasyon ang isang sulat na nananawagan kina Presidente George W. Bush at kanyang mga alyado na itigil ang planong digmain ang Iraq. Kabilang sa 318 lumagda sa sulat ay mga lider ng Anglican Church, International Physicians for the Prevention of Nuclear War, ang US Peace Council at mga *environmentalist* tulad ng Friends of the Earth Australia.